

Покраїнська скупштинська одлука о Покраїнским защитнікови гражданох - омбудсманови

("Сл. новини АП Войводини", число 37/2014)

На основи члена 56. пасус 7. Статута Автономней Покраїни Войводини («Службени новини АПВ», число 20/2014),

Скупштина Автономней Покраїни Войводини, на схадзки хтора отримана 23. септембра 2014. року, принесла

ПОКРАЇНСКУ СКУПШТИНСКУ ОДЛУКУ О ПОКРАЇНСКИМ ЗАЩИТНІКОВИ ГРАЖДАНОХ - ОМБУДСМАНОВИ

І ОСНОВНИ ОДРЕДБИ

Член 1.

Зоз Покраїнску скупштинску одлуку о Покраїнским защитнікови гражданох - омбудсманови (у дальшим тексту: Одлука) ше установює независни и самостойни орґан Покраїнски защитнік гражданох - омбудсман, ушорює ше компетенції, поступок роботи того орґана, поступок вибераня и преставаня функції покраїнского защитніка гражданох - омбудсмана и заменікох покраїнского защитніка гражданох - омбудсмана и їх овласценя.

Член 2.

Шицки слова у тей одлуки хтори ґраматично родно опредзелени, означую и одноша ше и на хлопски и на женски род.

Член 3.

Покраїнски защитнік гражданох - омбудсман (у дальшим тексту: омбудсман) то независни и самостойни орґан АП Войводини хтори шици права гражданох и надпатра роботу покраїнских орґанох управи, явних подприємствох и установох хтори окончую управни и явни овласценя, а чий снователь АП Войводини (у дальшим тексту: орґани управи), у вязи з їх поступаньом у вивершованю одлукох и других правних актох АП Войводини.

Омбудсман щизи права гражданох окреме од потупеньох хтори з незаконїтим, недоцильним и неефикасним поступаньом направя орґани управи.

Омбудсман щизи права гражданох од потупеньох хтори з незаконїтим, недоцильним и неефикасним поступаньом направя орґани городской и општинскей управи у вивершованю роботох хтори им зверела АП Войводина зоз своей жридловей компетенції.

Член 4.

Омбудсман независни и самостойни у окончованю роботох хтори утвердзени з тоту одлуку и ніхто не ма право уплївовац на його роботу и поступане.

Омбудсман ше стара о зашити и унапредзеню людских и меншинских правох.

Омбудсман поступа у складзе з Уставом, потвердзенима медзинародними контрактами и общеприлапенима правилами медзинародного права, законом и подзаконскими общима актами.

Основни принципи дїйствованя омбудсмана то законїтосц, непристрасносц, независносц и справедлївосц.

Член 5.

Шедзиско омбудсмана ше находзи у Новим Садзе.

II ВИБОР И ПРЕСТАВАНЄ ФУНКЦІЇ

Член 6.

Функцию Покраїнского зашитніка гражданох - омбудсмана окончую покраїнски зашитнік гражданох - омбудсман (у дальшим тексту: омбудсман) и заменїки покраїнского зашитніка гражданох - омбудсмана (у дальшим тексту: заменїки омбудсмана).

Омбудсман, односно заменїк омбудсмана, не може окончовац анї єдну другу явну або професионалну длужносц, буц член политичней орґанизациї, або ше занїмац з другу роботу хтора би могла уплївовац на його самостойносц и независносц.

Омбудсман, односно заменїк омбудсмана, ше може винїмково занїмац зоз наукововигледовацку роботу, образовну або уметніцку діялносцу и обявйовац авторски діла.

З дньом ступаня на длужносц омбудсмана, односно заменїка омбудсмана, преставаю шицки його професионални и други функции, односно длужносци або роботи хтори по теди окончовал, кед су противни одредбом тей одлуки, як и членство у политичних орґанизацийох.

Член 7.

Омбудсмана вибера и розришуе Скупштина Автономней Покраїни Войводини (у дальшим тексту: Скупштина) зоз двотрецинску векшину гласох вкупного числа посланїкох.

Кандидата за омбудсмана можу предложити найменей 30 посланїки або скупштински одбор цо компетентни за питаня орґанизациї и роботи управи (у дальшим тексту: Одбор).

Омбудсмана ше вибера на шейсц роки и исту особу на тоту функцию мож виберац найвечей два раз єдно за другим.

Поступок за вибор омбудсмана почина найпознейше два мешаца пред виходзеньом мандату предходного омбудсмана.

Омбудсман за свою роботу одвитує Скупштини.

Член 8.

Омбудсман ма штирох заменїкох, з хторих ше по єдного вибера за обласци: права националних меншинох, права дзецка и равноправносц полох.

При виборе заменїкох ше водзи рахунку о ровномірней заступеносци обидвох полох и припаднїкох националних меншинох.

Заменїкох омбудсмана вибера Скупштина з векшину гласох вкупного числа посланїкох, на предкладанє омбудсмана.

Заменїкох омбудсмана ше вибера на шейсц роки и исту особу на тоту функцию мож виберац найвечей два раз єдно за другим.

Заменїки омбудсмана за свою роботу одвитує омбудсманови и Скупштини.

Член 9.

За омбудсмана може буц избрани державян Републики Сербії хтори виполнює шлїдуюци условия:

- 1) же є дипломовани правнїк,
- 2) же ма найменей седем роки искуства на правних роботах хтори од значносци за окончованє роботах з компетенциї Омбудсмана,
- 3) же є не осудзовани за виновне діло на безусловну кару гарешту найменей шейсц мешаца або за каребне діло пре хторе є неподобни за окончованє роботах у державним орґану,
- 4) же ма високи морални и фахово квалитети,
- 5) же ма замеркованє искуство у заштити правох гражданох.

Член 10.

За замініка омбудсмана може буц избрани державян Републики Сербії хтори виполнюе шлїдуюци условия:

- 1) же ма високу фахову приготовку,
- 2) же ма найменей пейц роки искуства у обласци хтора од значносци за окончованє работох з компетенції Омбудсмана,
- 3) же є не осудзовани за виновне діло на безусловну кару гарешту найменей шейсц мешаца або за каребне діло пре хторе є неподобни за окончованє работох у державним орґану,
- 4) же ма високи морални и фахово квалитети,
- 5) же ма замерковане искуство у зашити правох гражданох.

Член 11.

Пред ступаньом на длужносц, омбудсман и замініки омбудсмана пришагаю пред Скупштину. Текст пришаги глаши: «Пришагам же свою длужносц будзем окончавац совисно, одвичательно, независно и непристрасно и же свой труд унапрямим на унапредзене и зашиту людских правох, у складзе з Уставом и законом.»

Омбудсман и замініки длужни ступиц на длужносц у чаше 30 дньох од дня вибору.

Кед омбудсман, односно замінік омбудсмана, без оправданей причини не ступи на длужносц у чаше 30 дньох од пришаганя, трима ше же є не избрани, цо Скупштина констатуе на основи обвисценя хторе достане од Одбору. У тим случаю ше такой порушуе поступок за вибор нового омбудсмана, односно замініка омбудсмана.

Член 12.

Функция омбудсмана и замініка омбудсмана престава:

- 1) з виходзеньом мандату, кед ше го знова не вибере,
- 2) у случаю шмерци,
- 3) зоз задзекованьом,
- 4) з траценьом державянства,
- 5) з виполньеньом условийох за пензию, у складзе зоз законом,
- 6) з наступаньом тирвацей физичней або менталней неспособносци за окончованє функції,
- 7) з розришеньом.

Причину за преставанє функції зоз пасуса 1. того члена констатуе Одбор и о тим обвисцуе Скупштину.

У случаю преставаня функції омбудсмана и замініка омбудсмана пре причини яки наведзени у пасусу 1. точ. 1-6. того члена, Скупштина без розправи приноси одлуку з яку ше констатуе здобуванє условийох за преставанє функції.

Правни пошлїдки преставаня функції наступаю од дня приношеня одлуки зоз пасуса 3. того члена.

Член 13.

Омбудсман, односно заменїк омбудсмана, може буц розришени од длужносци скорей як цо прейдзе час на хтори є избрани кед:

- 1) нефахово и несовисно окончує свою функцію,
- 2) окончує другу явну функцію або професионалну діялносц, односно другу длужносц або роботу хтора може уплївовац на його самостойносц и независносц, або кед поступа процивно закону з яким ше ушорює зоперанє зраженя интересох при окончованю явних функційох,
- 3) будзе осудзени за виновне діло пре хторе є неподобни за окончованє тей функції.

Омбудсман и заменїк омбудсмана ше маю право обрациц ґу покраїнским посланїком на схадзки Скупштини на хторей ше одлучує о їх розришеню.

Поступок за розришенє ше порушує на иницијативу Одбору або трецини посланїкох, а за розришенє заменїка омбудсмана и на иницијативу омбудсмана.

Одбор обвисцує Скупштину о тим же чи єст и яки то причини за розришенє.

Скупштина розришує омбудсмана або заменїка омбудсмана кед за розришенє гласала иста векшина посланїкох яка потребна за вибор омбудсмана, односно заменїка омбудсмана.

Член 14.

Омбудсман одредзує заменїка хтори го заменує у случаю його одсутносци або зопартосци же би окончовал роботи.

У случаю преставаня або розришеня омбудсмана, по виберанє нового, функцію омбудсмана окончує заменїк омбудсмана хторого омбудсман одредзел же би го заменьовал у случаю його одсутносци або зопартосци окончавац функцію.

Выбор нового омбудсмана ше окончи найпознейше у чаше шейсцох мешацох од дня преставаня функції скорейшого омбудсмана.

III ОВЛАСЦЕНЯ

Член 15.

Омбудсман овласцени контроловац почитованє людских правох, законїтосц, доцильносц, ефикасносц и правилносц у работи орґанох управи у вязи з їх поступаньом у вивершованю одлукох и других правних актох АП Войводини и щизиц права гражданох окреме од потупеньох

яки з незаконїтим, недоцильним и неефикасним поступаньом направя орґани управи. Омбудсман щизи права гражданох и од потупеньох яки з незаконїтим, недоцильним и неефикасним поступаньом направя орґани городской и општинской управи у вивершованю работох хтори им АП Войводина зверела зоз своєї жридловой компетенції.

Член 16.

Омбудсман провадзи процеси приношеня покраїнских предписаньох и вименки и дополненя важащих, у шицких обласцох витворйованя людских правох.

Омбудсман ма право предкладац покраїнски скупштински одлуки и други общи акти хтори приноши Скупштина зоз своєї компетенції, окреме кед трима же до потупйованя права гражданох приходзи пре недостатки у предписаньох.

Омбудсман овласцени у поступку пририхтованя предписаньох Покраїнской влади и Скупштини дац думанє и препоруки у вязи зоз предлогами одлукох, кед ше з нїма ушорює питаня од значносци за защиту правох гражданох.

Член 17.

Омбудсман континуовано надпатра и провадзи применку медзинародних контрактох, стандардох и предписаньох з обласци людских правох и на основи призбераних информациейох предклада мири за злєпшанє стану у обласци защити и унапредзеня людских правох.

Член 18.

Омбудсман запровадзує вигледованя пре увид до стану людских правох, идентификоване проблемох и формулованє препорукох за витворйованє, защиту и унапредзенє людских правох.

Член 19.

Омбудсман овласцени информовац гражданох о предписаньох и давац правни совити о можлївосцох за витворйованє їх правох, упутиц подношителя притужби на порушованє одвитууючого правного поступку пред компетентними орґанами, кед таки поступок предвидзени.

Член 20.

Омбудсман овласцени явно препоручиц розришенє функционера хтори одвичательни за потупенє правох гражданох, односно иницировац порушованє поступку за утвердзованє одвичательносци занятого у орґану управи хтори непоштрєдно одвичательни за направенє потупенє.

Кед у работи функционера або занятого у орґану управи пренайдзе елементи виновного або другого карєбного дїла, омбудсман овласцени поднесц вимаганє компетентному орґану, односно прияву за порушованє виновного, потупового або другого одвитууючого поступку.

Член 21.

Омбудсман подноши Скупштини рядови рочни звіт у хторим ше наводза податки о активносцох у предходним року, податки о замеркованих недостаткох у роботі орґанох управи, дава общу оцєну роботи орґанох управи зоз становиска применки предписаньох, як и предкладаня за злєпшанє положєня гражданох у одношеню на орґани управи.

Звіт облапя податки о чишлє и структури притужбох, замерковани препущєня и препоруки за їх одстраньованє, як и критики и похвали дзєпоедним орґаном управи и функционером.

Звіт ма окреми часци за обласци правох националних меншинох, правох дзєцка и правох по основи ровноправносци полох. Окреми часци звіту составяю заменїки омбудсмана.

Звіт о роботі ше подноши найпознєйше по 31. марец за предходни рок и обявює на урядовим интернет боку Покраїнского зашитнїка гражданох - омбудсмана.

На вимаганє омбудсмана, Скупштина положи на дньови шор звіт зоз пасуса 1. того члена и будзе розправяц о нїм.

Омбудсман може участвовац у розправі о звіту.

Член 22.

Омбудсман може поднєсц окреми звіт Скупштини, кед оцєнї же то вимагаю окреме важни причини або кед Скупштина вимага од нього таки звіт.

Окреми звіт ше обявює на урядовим интернет боку Покраїнского зашитнїка гражданох - омбудсмана.

Член 23.

Омбудсман обвисцує компетентни орґани и ширшу явносц о потупйованю людских правох и видава сообщєня о потупйованю правох гражданох.

Член 24.

Омбудсман орґанизує совитованя и кампанї у обласци образования о людских правох и питаньох од значносци за витворйованє людских правох и участвує у їх роботі.

Член 25.

Омбудсман овласцени порушац пред Уставним судом поступок за оцєну уставносци и законїтосци законох, других предписаньох и общих актох.

Член 26.

Омбудсман ма право присуствовац на шицких схадзкох Скупштине и скупштинских одборах и право участвовац на скупштинскей розправе кед ше розправя о питаньох з його компетенції.

Член 27.

Омбудсман сотрудзуе и чера искуства з другима омбудсманами у жеми и иноземстве и може буц член домашніх и медзинародних здруженьох омбудсманох.

Член 28.

Омбудсман сотрудзуе зоз Защитніком гражданох Републики Сербії у окончованю работох Национального механізму за превенцию тортури и порядне нацивиює места дзе ше находза особи цо позбути шлєбоди, пре превенцию тортури и других немилосердних нелюдских або понїжующих карох и поступкох.

Член 29.

Заменїк омбудсмана за права националних меншинох щизи права националних меншинох и овласцени є контроловац роботу орґанох управи у обласцох витворйованя и унапредзованя правох националних меншинох.

Заменїк омбудсмана за права дзецка щизи права дзецка и овласцени є контроловац роботу орґанох управи у обласцох витворйованя и унапредзованя правох дзецка.

Заменїк омбудсмана за равноправносц полох щизи гражданох по основи равноправносци полох и овласцени є контроловац роботу орґанох управи у витворйованю и унапредзеню равноправносци женох и хлопох.

Овласценя зоз чл. 15-18. ше одноша и на заменїкох омбудсмана, у рамикох їх обласци роботи.

Член 30.

Омбудсман окончуе и други работи, у складзе зоз законом, одлуками и другима актами Скупштине.

IV ПОСТУПОК

Член 31.

Омбудсман порушуе поступок по притужби гражданох або по власней иницијативи, на основи спознаньох з других жридох, кед оцєні же постої або же постојало потупене правох гражданох з боку орґанох управи.

Под понятим граждан, у смислу тей одлуки, подрозумюе ше физичну особу хтора домашні державян и каждую физичну особу хтора странски державян, як и каждую домашню або странску правну особу о чиїх правах и обовязкох одлучую орґани управи зоз члена 3. тей одлуки.

Омбудсманови ше у мено физичней особи може обрациц и законски заступнік, полномоцнік и овласцена особа орґана старательства, а кед ше роби о потупеню правах правней особи, особа цо овласцена за заступанє тей правней особи. У мено и зоз согласносцу особи чийо право потупене, притужбу може поднесц и орґанизация цо ше занїма зоз защиту людских правах або друга особа.

Член 32.

Притужбу мож поднесц найпознейше у чаше єдного року од зробеного потупеня правах гражданох, односно остатнього поступаня, або препущеня орґана поступиц у вязи зоз зробеним потупеньом правах гражданох.

Винїмково, омбудсман може поступац по притужби и после виходзеня того термину у случаю же преценї же ше роби о чежшей форми потупеня людских правах.

Член 33.

Условие за порушованє поступку того же подношитель пред подношеньом притужби пробовал защициц свойо права у одвитующим правним поступку и же вичерпани шицки правни средства, односно же нет правне средство за одстраньованє потупеня на яке подношитель указує.

У случаю же не выполнене условие зоз пасуса 1. того члена, Омбудсман упуци подношителя притужби на порушованє одвитующего правного поступку, кед таки поступок предвидзени и не будзе порушовац поступок док не ше не вичерпаю шицки правни средства.

Винїмково, омбудсман може порушац поступок и кед подношитель не пробовал защициц свойо права, односно и пред тим як цо вичерпани шицки правни средства, кед ше притужбу подноши пре незаконїту роботу, непочитованє началох и правилох управного поступку, непочитованє правилох етичного справованя и неприкладного справованя занятих ґу гражданином.

Член 34.

Омбудсман не поступа по анонимних притужбох.

Винїмково, кед ше трима же у анонимней притужби єст основи за поступанє, омбудсман може порушац поступок по власней иницијативи.

На вимаганє подношителя притужби, у случаюх хтори окреме оправдани, омбудсман не муши орґану управи одкриц идентитет подношителя притужби.

Член 35.

Притужбу ше подноши у писаней форми, уключуюци шицки способи електронскей комуникації, без окреме утвердзеной форми и вона не подпада под плацене такси або надополненя.

Винїмково, представку мож виявиц и усно на записнік.

Особи цо позбути шлебоди маю право поднесц представку у запечацовой коверти. Особи хтори заняты у установох дзе ше находза особи цо позбути шлебоди маю обовязку, без отвераня и затримованя, представку загарештованей особи такой доручиц омбудсманови.

Член 36.

Притужба ма назву орґана на чию ше роботу одноши, опис потупеня правох, факти и докази на яких ше притужбу снуе, податки о тим хтори правни средства вихасновани и податки о подношительови притужби.

Член 37.

Омбудсман длужен поступиц по каждой притужби окрем кед:

- 1) предмет, на хтори ше одноши притужба, не спада до компетенції Омбудсмана,
- 2) притужба поднешена после виходзена термину за подношене, а не виполнюе условие зоз члена 32. пасус 2. тей одлуки,
- 3) притужба поднешена пред тим як цо вихасновани шицки розполагаюци правни средства, а не виполнюе условия зоз члена 33. пасус 3. тей одлуки,
- 4) притужба анонимна, а не виполнюе условия зоз члена 34. пасус 2. тей одлуки,
- 5) у притужби нет потребни податки за поступане, а подношитель тоти недостатки не одстранел ані у дополнюющим термину яки одредзени за дополньоване притужби.

Кед омбудсман оценї же нет основи за поступане, о тим обвисцуе подношителя притужби и обгрунтуе причини за непоступане.

У случаю же подношитель притужби одступи од притужби, поступок ше застанови. Винїмково, поступок ше предлужи кед ше притужбу подноши пре незаконїту роботу, непочитоване началох и правилох управного поступку, непочитоване правилох етичного справованя и неприкладного справованя занятих ґу гражданом.

Член 38.

О порушованю и законченю поступку омбудсман обвисцуе подношителя притужби, як и орґан управи на чию ше роботу притужба одноши.

Член 39.

Орґан управи обовязни одвитовац на шицки вимагання омбудсмана и доручиц му шицки вимагання информации и списи у чаше яки вон одредзи, а хтори не може буц кратши як 5 днї анї длуґши як 15 днї.

Орґани управи маю обовязку сотрудзовац зоз омбудсманом и оможливиц му приступ до просторийох и положиц на розполагаванє шицки податки з якими розполагаю, а хтори од значносци за поступок хтори водзи, односно за витворйованє цилю його превентивного дїйствованя, без огляду на ступень їх тайносци, окрема кед то то у процивносци зоз законом.

Омбудсман ма право окончиц розгварку з кждим занятим у орґану управи, кед то значне за поступок хтори водзи.

Омбудсман и заменїки омбудсмана длуґни и по преставаню функції чувац тайносц податкох хтори достали у окончованю функції.

Обовязку чованя тайносци маю и заняти у Фаховей служби Покраїнского зашитнїка гражданох - омбудсмана.

Член 40.

Функционере и руководителе у орґанох управи длуґни прияц омбудсмана на його вимаганє найпознейше у чаше 8 днєох по посиланю вимаганя у писаней форми.

Член 41.

Кед орґан управи процив хторого ше поднесло притужбу сам одстранї недостатки под час тирваня поступку, омбудсман о тим обвисци подношителя притужби и застанови поступок.

Член 42.

По утвердзованю шицких релевантих фактох и околносцох омбудсман може обвисциц подношителя притужби же притужба неоснована або може утвердзиц же було несправилносци у работи орґана управи.

Кед оценї же було несправилносци у работи орґана управи, омбудсман тому орґану доручує думанє.

Кед оценї же було таки несправилносци, односно пошлїдки несправилносцох яки мож одстранїц, омбудсман орґану зоз думаньом доручи и препоруку о тим як одклонїц несправилносц, односно пошлїдки тей несправилносци.

Орґан управи длуґни, найпознейше у чаше 15 днєох по доставаню думаня або препоруки, обвисциц омбудсмана о поднятих мирох.

Кед орґан управи не поступи по препоруки, омбудсман о тим може обвисциц явносц, непоштредни висши орґан, Скупштину, Покраїнску владу односно општинску/городску раду.

Член 43.

Одредби чл. 29-42. тей одлуки сходно ше применює и на поступок хтори омбудсман порушал по власней иницијативи.

Член 44.

Окрем права на порушоване и водзене поступку, омбудсман ма право и превентивно поштредовац и давац совити и думаня о питањох зоз своей компетенциї, пре унапредзене работи орґанох управи и унапредзене заштити людских правох и шлебодох.

V ФАХОВА СЛУЖБА И СРЕДСТВА ЗА РОБОТУ

Член 45.

Омбудсман формує фахову службу за окончоване фахових и административно-технічних роботох.

Зоз фахову службу руководзи директор служби.

Омбудсман поставя и розришує директора фаховей служби.

Омбудсман може одлучиц дзепоедним фаховим сотрудніком звериц одредзени овласцена хтори буду окончовац у його мено.

На директора и занятих у фаховей служби ше применює предписаня о роботних одношеньох и плацох у покраїнских орґанох.

Омбудсман приноси одлуки о сновану и преставаню роботного одношеня занятих и витворйованю правох зоз роботного одношеня.

Член 46.

Омбудсман ма право на плацу у висини плаци покраїнского секретара хтора звекшана за 20%, а заменіки омбудсмана у висини плаци заменікох покраїнского секретара хтора звекшана за 20%.

Член 47.

Омбудсман и заменіки витворюю права по основи работи, у складзе зоз предписанями о роботних одношеньох у покраїнских орґанох.

Член 48.

Омбудсман приноси Діловнік о работи и акт о нукашней орґанизациі и систематизациі работних местох у Фаховей служби Покраїнского защитніка гражданох - омбудсмана.

Акт о нукашней орґанизациі и систематизациі фаховей служби ше приноси з предходно прибавеним думаньом Одбору.

Член 49.

Средства за роботу омбудсмана ше обезпечує у бюджету АП Войводины.

Обсяг и структуру средствох предклада омбудсман.

VI ПРЕХОДНИ И ЗАКОНЧУЮЦИ ОДРЕДБИ

Член 50.

После приношеня тей одлуки омбудсман и заменіки омбудсмана предлужую з роботу по виходзене термину на яки су избрани.

Поступки хтори по ступане на моц тей одлуки не закончени, законча ше по одредбох тей одлуки.

Омбудсман длужен у часе 30 дньох по ступаню на моц тей одлуки, усоглашиц Діловнік о работи и акт о нукашней орґанизациі и систематизациі работних местох.

Член 51.

Зоз ступаньом на моц тей одлуки престава важиц Покраїнска скупштинска одлука о Покраїнским омбудсманови («Службени новини АПВ», число 23/02, 5/04, 16/05, 18/09-пременка назви акта).

Член 52.

Тота одлука ступа на моц осми дзень по обявйованю у «Службених новинох Автономней Покраїни Войводины».

СКУПШТИНА АВТОНОМНЕЙ ПОКРАЇНИ ВОЙВОДИНИ

Нови Сад, 23. септембра 2014. року

**ПРЕДСИДАТЕЛЬ
СКУПШТИНИ АП ВОЙВОДИНИ,**

**Иштван Пастор, с.р.
(Pásztor István, s.k.)**